

Svrha pravila

Pravilo 19 bavi se nekolicinom igračevih opcija za olakšicu zbog neigrive loptice. To dozvoljava igraču da bira koju će opciju koristiti – uobičajeno sa jednim kaznenim udarcem – da bi se izbavio iz teške situacije bilo gdje na igralištu (izuzev u području kažnjavanja).

19.1 Igrač može odlučiti da uzme olakšicu zbog neigrive loptice bilo gdje izuzev u području kažnjavanja

Jedino igrač može odlučiti da tretira svoju lopticu kao neigrivu uzimajući olakšicu s kaznom po Pravilu 19.2 ili 19.3. Olakšica zbog neigrive loptice dozvoljena je bilo gdje na igralištu, izuzev u području kažnjavanja. Ako je loptica neigriva u području kažnjavanja, igračeva jedina opcija za olakšicu jeste da uzme olakšicu sa kaznom po Pravilu 17.

19.2 Opcije olakšice zbog neigrive loptice u opštem području ili na grinu

Igrač može uzeti olakšicu zbog neigrive loptice korišćenjem jedne od tri opcije po Pravilu 19.2a, b ili c, u svakom slučaju dodajući **jedan kazneni udarac**. Igrač može uzeti olakšicu udarac-i-udaljenost po Pravilu 19.2a čak i kada prvobitna loptica nije pronađena i identifikovana. Ali da bi uzeo olakšicu unazad-po-liniji po Pravilu 19.2b ili olakšicu sa strane po Pravilu 19.2c, igrač mora znati mjesto na kome je prvobitna loptica.

19.2a Olakšica udarac-i-udaljenost

Igrač može igrati prvobitnom ili drugom lopticom s mjesta sa kojeg je izveden prethodni udarac (pogledajte Pravilo 14.6).

19.2b Olakšica unazad-po-liniji

Igrač može ispuštati prvobitnu ili drugu lopticu (pogledajte Pravilo 14.3) u području olakšice koje je zasnovano na referentnoj liniji koja se prostire unazad od rupe kroz mjesto na kome leži prvobitna loptica:

- **Referentna tačka:** tačka na igralištu koju je izabrao igrač a nalazi se na referentnoj liniji i dalje je od rupe nego što je to mjesto na kome leži prvobitna loptica (bez ograničenja u pogledu toga koliko unazad na liniji):
 - pri biranju ove tačke, igrač treba da je naznači korišćenjem nekog predmeta (kao što je ti);

- ako igrač ispušta lopticu a da nije izabrao ovu tačku, smatra se da je referentna ona tačka na liniji koja je na istom rastojanju od rupe kao i tačka u kojoj je ispuštena loptica prvi put udarila o tlo.
- **Veličina područja olakšice mjerena od referentne tačke:** jedna dužina štapa, ali u okviru sljedećih ograničenja:
- **Ograničenja u pogledu položaja područja olakšice:**
 - ne smije biti bliže rupi od referentne tačke i
 - može biti u bilo kom području igrališta,
 - ali ako se više od jednog područja igrališta nalazi unutar jedne dužine štapa od referentne tačke, loptica se mora umiriti u području olakšice u istom području igrališta u kome je loptica prvi put udarila o tlo pri ispuštanju u područje olakšice.

19.2c Olakšica sa strane

Igrač može ispuštati prvobitnu ili drugu lopticu u ovo područje olakšice sa strane (pogledajte Pravilo 14.3):

- **Referentna tačka:** mjesto na kome je prvobitna loptica.
- **Veličina područja olakšice mjerena od referentne tačke:** dvije dužine štapa, ali u okviru ovih ograničenja:
- **Ograničenja u pogledu položaja područja olakšice:**
 - ne smije biti bliže rupi od referentne tačke i
 - može biti u bilo kom području igrališta,
 - ali ako se više od jednog područja igrališta nalazi unutar dvije dužine štapa od referentne tačke, loptica se mora umiriti u području olakšice u istom području igrališta u kome je loptica prvi put udarila o tlo pri ispuštanju u područje olakšice.

Kazna za igranje lopticom s pogrešnog mjesta kršenjem Pravila 19.2: opšta kazna po Pravilu 14.7a.

19.3 Opcije olakšice za neigrivu lopticu u bankeru

19.3a Uobičajene opcije olakšice (jedan kazneni udarac)

Kada je igračeva loptica u bankeru:

- igrač može uzeti olakšicu zbog neigrive loptice uz **jedan kazneni udarac** po bilo kojoj opciji u Pravilu 19.2, **izuzev:**

- što se loptica mora ispustiti i umiriti u području olakšice u bankeru bez obzira na to da li igrač uzima olakšicu unazad-po-liniji (pogledajte Pravilo 19.2b) ili olakšicu sa strane (pogledajte Pravilo 19.2c).

19.3b Dodatna opcija za olakšicu (dva kaznena udarca)

Kao dodatnu opciju olakšice kada je igračeva loptica u bankeru, uz **ukupno dva kaznena udarca**, igrač može uzeti olakšicu unazad-po-liniji van bankera po Pravilu 19.2b.

Kazna za igranje lopticom s pogrešnog mjesta kršenjem Pravila 19.3: opšta kazna po Pravilu 14.7a.